

պտոյտ էին դալիս դէմքերի վրայ, հպարտօրէն դիտում հանդիսականներին եւ վստահ իրենց հրապոյրով՝ դռուդ, անմատչելի՝ իշխում էին դահլիճի վրայ:

Էլիօնօրան նստած էր գրեթէ անշարժ, ինքը իր մէջ ամփոփուած, վարժ իր մօր շուքի մէջ ապրելու, ամբողջովին տարուած երաժշտութիւնով եւ, ինձ համար, աւելի գեղեցիկ քան իր մայրը, որովհետեւ հոգեպէս աւելի խոր:

Երբեմն, ձեռքում բռնած հովահարը նա լքում էր ծունկերի վրայ, աչքերը յառում դէպի հեռուն ու կանգ առնում մի ինչ որ երազի վրայ, ձանձրալի այս միջավայրից դուրս, կեղծ այս լուսաւորութիւնից մի վայրկեան ազատուած եւ ո՞վ է իմանում ինչ բոցավառ մըտածումները մէջ կորած:

Ու այն օրը, երբ պատահաբար, ես նրա հետ ծանօթացայ, իր առաջի խօսքերից ես զգացի, որ պաշտօնական, ընկերային իր ձեւերի տակ, թագնուած էր զսպուած այն երաժշտականութիւնը, հոգեկան այն հուրը եւ խորութիւնը, հոգեբանական այն բարդութիւնը, որ յատուկ է կանացի եզակի անհատականութիւններին:

Երկու, տարբեր աշխարհներից եկած մեր զգացողութիւնների մէջ նետուեց անտեսանելի այն կամուրջը, որը կապ է եւ անցք, հաղորդակցութիւն եւ շղթայ:

Եւ այն օրուանից ի վեր, Վենետիկը, որ ինձ համար պարզ տեսարան էր, աչքերի աննման հաճոյք եւ գեղարուեստական խնդիր, կամաց կամաց կերպարանափոխուեց, դարձաւ իրական տարր, որի մէջ վիճակուած էր ինձ ապրել, ուրիշ՝ զարկերակիս հետ միասին բաբախող եւ մարմին՝ մարմնիս հետ:

Լոյսերը լսաչաձեւեցին:

Սրուած զգայնութեանս մէջ ականթ եւ զմբուխտ փշրող վերջալոյսները արիւն թորեցին եւ մարմնիս վրայ զգացի կենդանացած մարմարների սարսուռը:

Կեանքը սահում էր հարիւրաւոր կամուրջների վրայից՝ թեթեւ, նուրբ սրունքները բաց եւ ծփող սեւ շարը վայելչօրէն նետուած ուսերին:

Էլիօնօրան կարողանում էր ամէն մի ան-

կիւնից ջութակի դիւթիչ մի ձայն լսել: Նրա աչքերի հետ ման փին դալիս հրապուրուած իմ աչքերը: Նա տեսնում էր ջուրերի տակ ապրող խորհրդաւոր կեանքը, փոքրիկ եւ աննշան քանդակի մէջ սառած իմաստը, քարերի վրայից սահող երազը, շուքերի մէջ անցնող պտկերների թափօրը: Նա տեսնում էր ամէն ինչ, որովհետեւ ամէն ինչ իր սեփականութիւնն էր, իր ներքին աշխարհից բխած եւ ձեւաւորուած կեանք էր: Ու նրա աչքերը նման էին նայադների աչքերին, որոնք ափից սրնդի ձայն են լսում եւ օդի մէջ կայծկլտող արծաթէ գանդակ:

Հարբեցուցիչ օրեր:

Պտոյտներ նեղլիկ կալիէների միջից դէպի հեռաւոր մի պալատի վրայ ընկած երկնքի կապոյտ մի կտորի համար: Շիկագոյն իր մագերի մէջ թառած լուսնոյ շողը եւ քարի տակ կլկլող իր ձայնի աղբիւրը, հոգեկան հարիւրաւոր շեշտերից անցած՝ վտիտ եւ բիւրեղէ փայլելուաներով: Ու կեանքին եւ երեւոյթներին մօտենալու նրբադին այն ձեւը, որ ամէն բան երգի է վերածւում. ո՞չ այնքան մտածում ինչքան սարսուռ մթնոլորտ մտքի շուրջը, հօբնյի խոր եւ մեղամաղձոտ ձայն, զգայարանքի միջից պոկած ահունքների մի շարք եւ սէր՝ դունաւոր, ափրիկեան թռչունի թեւերի նման բացուած, անքնական մի լուսնի լուսաւորութեան տակ:

Սիրած ամէն մի կնոջ հետ մենք մի երազ ենք ապրում:

Նոր աչքերով նոր մի աշխարհ ենք մըտնում:

Սէրը՝ դիտութիւն է:

Վենետիկը՝ բիւզանդական մի թաղուհու նման՝ թէօտօրա՝ նստում էր թանկագին քարերով զարդարուած մի գահի վրայ, վսեմ՝ իր ոսկէ թագի տակ, գոռոզ եւ մեծդի՝ մուրթ կըտաւի վրայ շարուած աղամանդների պատմուճանով. անշարժ եւ փառաւոր, անմատչելի եւ մտերիմ. չափազանց կարմիր շրթունքների մէջ՝ մահ սեղմած եւ կապոյտ մեծ աչքերը յառած՝ սիրային անկարելի մեծ երազի վրայ:

Ես ման էի դալիս գինովցած քայլերով, կորած՝ անքնական եւ դիւթիչ այս աշխարհում, բարձր ալիքների մէջ ընկած մակոյկի